

Dakota, amigonan musico y pueblo a despedi Juancho Kock awor den curazon y den feliz memoria hopi kerí

Skirbi pa Ruthy "Lady Ruyth" Vrieswijk-Bergen.

E programa musical a cuminsa cu canto e.o. di Thali Wever y Casin Giel, despues di algun piezanan instrumental, mientras e rij largo di hende tabata sigui move, drentando un pa un, pa muestra e ultimo respet. Presidente di CBD Sr. Neto Zarra tabata para na e entrada pa a guia e fluho di hendenan.

Despues a sigui cu canto di un di nos grandinan "Tirso Steba", ora cu su voz unico a trece hopi bunita recuerdo sigur cu su tremendo canto di dushi boberonan, cu Juancho tambe a gusta canta, anto algun di nan tambe den duo cu Edwin Zichem, awe dfm. No, ami mes no tabata tey personalmente e tempo ey, (mi tabata un mucha) ta mi tia Cornelia, carinosamente yama Tanta Nea of Shone a contami, mientras cu Tirso tabata cantando. Segun mi, e guitarista clasico Ivan Jansen tambe a toca den e banda, pero mi no por a wak ki ora, mucho hende para.

Despues a sigui cu canto di un coro masculino forma pa artistanan grandi di Aruba, e.o. Casin Giel, Tico Quillotte, Papito Rafael, Vicente Kelly, Harry Zimmerman, y Juni de Freitas, cu tocador nan profesional tambe manera e.o. Amado Rosina, pa a despedi, den un forma hopi impulsivo inspira na e momentonan ey, (of palabra di antemano) cu palabranan firme intercambia cu e coro firme: "Wanta pa bo tey". Un Centro di Bario di Dakota completamente yen di dakoteronan y ciudadanonan cu a bini for di tur distrito pa tuma despedida di e gran Rey di Tumba Juancho Kock. Un homber simpel y humilde cu a duna tur loke e tabata tin aden como un cantante, casa cu un humilde Sra. di un famia di e bario Socotoro. Y a biba felizmente den e dushi bario di Dakota, den e caya cu despues a haya su nomber oficialmente, como muestra di aprecio y amor pa su aporte na cultura di Aruba, specialmente ariba tereno di canto di tumba. Otro artistanan cu mi a topa

of mira ta e.o. Vio Wester, Ito Dania, Jossy Brokke, Chencho Kelly y Lucio Rivadeneira. Di e generacion mas hoben nos a mira e.o. Edjean Semeleer. For di unda mi tabata sinta, mi no por a mira tur cos, pero regularmente mi a lanta para y cana bay para un tiki mas serca pa mira mas mihor ken tur tabata ariba e stage. E oradornan tambe tur tabata personanan masculino e.o. Joy Kock, Doc Williams y ministro Ramon Lee. Ora mi a topa cu Sra. Maybeline Arends-Croes, mi a puntre si tawatatin cantantenan femenino tambe den e conhuunto nan musical di antes, y el a bisami cu no. Tabata tin trio femenino si, e.o. "Trio Olineida", esun forma pa rumannan Dijkhoff, e.o. mi amiga hopi aprecia Ina Geerman-Dijkhoff. Y...no pa lubida...trio Las Campiranas di Bernadina Growel (awe dfm) y dos persona femenino mas.

E maestro di ceremonia, e cabayero Jimmy Oduber a hasi un bon papel, manera ta su custumber, e biaha aki cu su cabey un poco largo como su new look. Hopi ta corda e programa cu musica di artistanan local tambe na Radio Galactica cu Jimmy sa presenta.

Mi a expresa na Maybe, cu, e oradornan y e participantenan artista y musico cu a duna nos amigo Juancho un despedida musical cucantofordicurazon, tur tabata hende homber. Pues....it was "a man's thing". Mas y mas Aruba ta custumbra cu despedida nan asina ki pa artistanan y of musiconan, baluarte riba tereno cultural-musical. Esta, cu musica alegre tambe, manera ta fiesta tin cu celebracion. Juancho a wordo recorda den un forma tristo-alegre. Tur cu a participa na e parti di canto y di musica den Centro di Bario, a duna di nan curazon, pero ta ora Juni de Freitas tabata cantando pa Juancho mi lananan a rijis. El a canta cu hopi sentimiento, cu hopi emocion. Continuacion Pagina B-18.





Despues ora Claudius Phillips a canta e bunita cancion gospel "It is well with my soul" "(Mi mes alma ta bon), mi a comparti cu su sentimentonan tambe .E tambe a touch mi curazon. Un bon amigo dakotero Chobo Maduro a introduci mi na Tirso Steba, ora el a bin den e direccion na unda mi bunita tia Sra.Vda. Cornelia Zichem-Bergen y ami tabata sinta, bao di e tent pafor ariba e plenchi. Mei mei di tur e hendenan. Mi a saluda nos tata di cultura tambe, Padu Lampe, sinta paden acompaña pa su yiu muher Vivian y Victor Samuel. Sigur tabata tin mas personahenan bon conoci, stima y aprecia den pueblo, pero mi no por corda tur. Pa aclarea algo, corda dushi pueblo di Aruba, no ta tur ora mi por participa y recita un

poema den programanan asina, nan ta programanan hinca den otro un poco adelanta di e dia mes riba cual lo ehecuta e programa Y tin cu duna otro hende e oportunidad tambe, aunke ami sa ta hopi impulsivo y di curazon aserca organisadornan tin biaha pa mi por recita. Manera sa bisa na hulandes, nee heb ik, ja kan ik krijgen. Mi ta purba tambe di convence varios hende, cu mi no ta pidi pa recita djis pa mi ta den publicidad. Berdad, e ta un "kick" pa skirbi y comparti hopi ariba tereno di scouting of di cultura, y ricibi bon comentario regularmente di hopi cu si ta gusta mi manera transparente. Shonnan, e ta parti di un di mi hobbynan pa alegria e curazonnan un crenchi.

Na varios dakoteronan cu a kere cu mi lo a recita locual mi a skirbi y laga publica den corant, comprende, tin biaha mi ta tribi aserca y puntra e momento ey si por, esta, si mi a logra inspira algo un tiki prome, otro biahnan mi ta warda pa otronan sigui nan curazon y aserca mi, pa mi no tende de vez en cuando keto bay cu , Lady Ruth, ta gusta publicidad y atencion. Aunke esaki ta un parti di e vitamina pa tur artista, poeta, musico of cantante. Danki na esnan cu a dunami compliment pa e bunita poesianan cu mi a dedica na Juancho den corant. Manera un di e bunita cancionnan cu Ann's Choir a canta den misa Fatima na Dakota durante e entierro di Juancho ta bisa:" Pero no quiero cantar solito, yo quiero

un coro de pajaritos "... Juancho, nos amigo tumbero Rey di tumba Juancho Kock, describi pa mi simbolicamente como un "Bunita pechi geel cu preto" den un di mi poesianan, lo sigui canta awor den e curazonnan alegre, specialmente durante temporada dushi di Carnaval. Y no ta pa casualidad mi a tende na BO GUIA FM den oranan di atardecer nochecer un dushi bolero di Tirso Steba. Mi ta hopi contento di por a hasi conoci cu un otro "grandi" di Aruba den su talentonan . E tambe ta birando mas grandi den edad... Un pa un di nos grandinan ta wordo yama pa bay mas aya..... Elgin Juddan, Edwin Zichem, Bernadina Growell, Juancho Kock, Maximiano Jacobs y

otroonan cu mi no por corda na e momentonan aki. Aruba..... braza bo tesoronan musical cu tei ainda.....cu ta "wanta pa nan tey ", manera e coro a canta pa Juancho. Stima nan, aprecia nan y duna nan reconocimiento na bida! Na coleganan trahando na e diferente radio emisoranan: Sigui toca nan musica, nan canticanan cu tin cu sigui inspira e generacionnan cu ta bini tambe. Nos a tende hopi bon comentario pa cu e bunita transmision di nos canal cultural TeleAruba, kendenan a trece e ceremonia di despedida y entierro di Juancho Kock, serca di mas curazon tambe. . Un resenja hopi largo, pero di curazon. Cu Juancho Kock sosega na paz.

